

TIMOHTI **Chyáng Hî Dàm Hun Kat é Laiká** **(1 Timothy)**

¹ Nga-nhông é hkyi yù Sû Garai Gasang eq nga-nhông é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Poluq gi,

² haù lumjìng hkyô má ngá zo sîng nghut sù, Timohti lé dang kyô kat lhê; haù Îwa Garai Gasang eq nga-nhông é Yhumsîng Hkrisduq Yesuq chyáng mâ é, jeju eq shogyo nhikmyin hkyô, ngingón hkyô gi, náng chyáng ru joq nyî sháng gaq ô.

Sará Pyoq Pé Lé Sidiq Râ Hkyô

³ Ngò, Makedoni mau má jé wang ló é hkûn, pying to hkô é eq rajung za, Ehpesu myuq má nyi to shi aq; haù hkûn sheq, nàng gi, shut shai é mhoqshit hkyô lé mhoqshit é bang a mhoq xoq lo râ matú le,

⁴ myit htoq mhô-myi dang eq a dat htûm é byù xik labaù má yhangmoq a ap nong râ matú le, haù bang lé hkunmó wó hkyó râ nghut lhê. Haù hkyô pé gi, lumjìng myit mai kut htoq é Garai Gasang é muzó lé lhoq htoq râ malaî, mabyoq jishûm za sheq lhoq htoq nyi é nghut lhê.

⁵ Haù hkunmó hkyó luî myit myoqbyu tô é hkyô gi, chyitdap myit yhang nghut ri; chyitdap myit haù gi, sansêng é i-myt, mara a bò bûn é myit eq lumjìng myit akying mai lo é nghut lhê.

⁶ Byù ra-am gi, haú hkyô pé mai htoq ló kôluí, dangsôm taí é hkyô shut lhing ló byuq bekô nghut ri.

⁷ Haú bang gi, jep é tarâ sará pé dut naù kôlhang, yhangmoq haí taí nyi é hkyô lé le, hkyak, haí lé mhoqshit é hkyô lé le, a sé kó nghut ri.

⁸ Rayuq yuq, jep é tarâ lé rago chung é nghut jáng, jep é tarâ gi, ge é hkyô nghut é lé, nga-nhúng sê lhê.

⁹ Haú jep é tarâ gi, dingmán bâng é matú tô tô é a nghut e za, tarâ lu laí é bang eq gumlau toq bâng é matú, tarâ a hkunggâ é bang eq mara kut bâng é matú, a chyoiyúng é bang eq lumjíng hkyô a cháng bâng é matú, yhangmoq é yhângwa lé nghut nghut, yhângnu lé nghut nghut, sat pyám bâng é matú, byù sat bâng é matú,

¹⁰ ashop é dông gungsho zùm yap é bang eq yuqgè yhangchang nyi zo lhum bâng é matú, jùn dông byù ung zo bang, mhaú é bang eq dakam mhaú bâng é matú, tengmán mhoqshit hkyô eq shai lhùm é lhunglhâng bâng é matú sheq, jep é tarâ tô tô é nghut é lé, nga-nhúng sê lhê.

¹¹ Tengmán mhoqshit hkyô haú gi, hkungsô wó é Garai Gasâng èq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

Poluq Chyáng Yhumsing É Jeju Joq Nyi É Hkyô

¹² Ngò gi, ngo lé wum-o byí é, nga-nhúng é Yhumsing Hkrisduq Yesuq lé jeju hkya-ôn lhê; hkâsu mù gâ le, Yhang gi, ngo lé lhumzui sù rayuq dông sôn yù luí, Yhâng é muzó jizó má hkyin kat yu é yanmai nghut lhê.

13 Hí hkûn, ngò gi, Garai Gasang lé taî hpoi sù, zing-ri sù eq byù rhoî sù nghut wú kôlhang, a sé shi mù lumjínng myit a bo e za kut é yanmai, shogyo nhikmyîn yu é hkyô lé ngò wó yu é nghut lhê.

14 Nga-nhûng é Yhumsîng é jeju lé le, Hkrisduq Yesuq eq sêng é lumjínng myit eq chyitdap myit lé le, ngá chyáng agùn agó hut hkyô kat byi bê nghut ri.

15 Yubak dap bang lé hkyi yù râ matú, Hkrisduq Yesuq gi, mingkan má jé lé bê gâ é dang gi, lumjínng é mungdang nghut luî, gè gè yhang lhom yù gíng é dang nghut lhê. Haû yubak dap bang má, ngò gi, yubak je ko sù nghut é nghut lhê.

16 Nghut kôlhang, Hkrisduq Yesuq gi, Yhang lé lumjínng luî ahtum abyuq é asak lé wó yû râ bâng é alik dut râ matú, yubak dap bang má yubak je ko sù nghut é, ngá é ahtoq má, Yhâng é hkam jan hkyô lhunglhang wó tûn shit sháng gaq ga, Garai Gasang gi, ngo lé shogyo nhikmyîn yu ri.

17 Haû mù, haû aróng eq hpungwup shingkang gi, ahtum abyuq é, a dat htên byoq é, myoq èq a byu-myang é Hkohlkâm nghut sù, rayuq zâ é Garai Gasâng chyáng pyat dedu ahtum abyuq ru joq nyî sháng gaq ô! Amen.

18 Ngá zo Timohti ê, nàng eq séng luî myiqhtoi dang joq wú é eq rajung za, ngò gi, nang lé haû dông mhoqshit kat lhê; haû mù, nàng gi, haû pé lé chung nyî luî, ge é majan zan mù,

19 lumjínng myit eq mara a bò bûn é myit bo nyî sháng gaq. Byù ra-am gi, haû hkyô pé lé he-ngik pyám kô é nghut luî, yhangmoq é lumjínng myit gi, wuî-sanghpo htên byoq ló é su htên byoq byuq bekô nghut ri.

²⁰ Haú bang má, Humenu eq Alesander le bò kômù, Garai Gasang lé taî hpoî é dang a taî râ matú mhoq yù kó sháng gaq nghû, ngò, yhangnhik lé Tsadán é loq má ap pyám bê nghut lhê.

2

Noqkuq Hkyô Eq Séng Luî Mhoqshit Byî É Hkyô

¹ Haû mù luî, ngò, hí pying kat nau é gi, tarâ hkunggâ é eq hkungga gíng é hkyô banshoq má, nga-nhúng wó nguingón yuqyo nyì sháng gaq, hkohkâm pé eq ahkáng ayá wó bang banshoq é matú le,

² yuq hkanmó é matú le, dúng tôngbán byi, kyúdung byi, dúng xoq byi, jeju hkyá-on byi, kut aq nghû nau ri.

³ Haû gi, ge é hkyô nghut mù, nga-nhùng é hkyi yù Sû Garai Gasang ô nau é hkyô nghut ri.

⁴ Yhang gi, byù lhunglhâng bang hkyi yu é hui mù, tengmán é mungdang lé sê gyo râ lé, ô nau nyi ri.

⁵ Hkâsu mù gâ le, Garai Gasang gi, rayuq za nghut luî, Garai Gasang eq byu é gyoro má sô xoq byi sù le rayuq za nghut lhê; haú yuq gi, xângzo byù nghut é Hkrisduq Yesuq nghut ri.

⁶ Yhang gi, byù lhunglhâng bâng é matú shîhtáí gunglik hkungga dông Yhânggùng lé byî pyám bê nghut ri; haû gi, ahkying yam-yoq jé é hkún, saksé htoq shit bê nghut lhê.

⁷ Ngò gi, tûngbàu pé lé, tengmán é lumjíng hkyô mhoqshit râ matú, hkô kyo sù rayuq eq lagyo rayuq dông hkyin tô é hui sù nghut lhê. Ngò, haû

su taî é gi, mhaû taî é a nghut, têng é hkyô lé za taî nyi é ru nghut lhê.

⁸ Yuqgè wuì gi, nhikjum yô é hkyô eq dang htíng htíng lhúm é hkyô a bo e za, jowò hkangmó má chyoiyúng é loq tù mù kyûdung râ lé, ngò ô nau ri.

⁹ Myiwe wuì gi, xâm nik nik é, hîng zè, palhé, hpaû jung mebû èq a mhôn chung e za, siri bo é mebu wut chûng mù, tap tap za, shuq shuq za kut luî,

¹⁰ Garai Gasang lé noqkuq é myiwe wuì eq gíng shoq, ge é muzò èq yhumsing gùng lé mhôn nyi râ lé le, ngò ô nau ri.

¹¹ Myiwe gi, uphkang tô é dông châng nyi mù, zim za mhoq yû kó sháng gaq.

¹² Myiwe gi, yuqgè lé mhoqshit râ hkyô lé le, yuqgè lé uphkang râ hkyô lé le, ngò ahkáng a byi; myiwe gi, zim za kut nyi ra râ nghut lhê.

¹³ Hkâsu mù gâ le, Adam lé hí hpan to mù, Ewaq lé hpan é ru nghut lhê.

¹⁴ Hau htoq agó, Adam gi, mhaû é hui zo sù a nghut; haû myiwe sheq mhaû é hui zo luî, mara kut shut é ru nghut lhê.

¹⁵ Nghut kôlháng, myiwe wuì gi, lumjín myit, chyitdap myit eq chyoiyúng hkyô má, shuq shuq za kut mù, yhangmoq xoq châng nyi kô é nghut jáng, zosháng hku é dông mai hkyi yu é hui kó râ nghut lhê.✠

3

Hpúng-up Eq Hpungtê Kut Râ Bâng É Hkyô

¹ Rayuq yuq, hpúng-up ayá lé ô nau nyi é nghut jáng, haú yuq gi, aróng wó é muzó lé ô nau nyi ri gâ é dang gi, lumgíng é dang nghut nyi ri.

² Haú mù luí, hpúng-up rayuq gi, mara hún râ hkyô a bo é sù, myíwe rayuq za wó é sù, dat sidiq é sù, yhumsing gùng lé wó hkang é sù, hkungga gíng é sù, byù bíng lé dat hkulum é sù, dat mhoqshit é sù,

³ Íhpê é jùn a dut é sù, byoq lhum byoq cheq a kut e za nùm é sù, mabyoq jishùm a lhoq htoq é sù, ngunzè lé a chyitdap é sù, nghut râ lhê.

⁴ Yhang gi, yhâng é ikun lé rago dat uphkâng luí, yhang zô pé mai hkungga myit bo é èq yhâng dang lé gyo byí é sù le, nghut râ lhê.

⁵ Rayuq yuq, yhumsing é ikun lé lháng a dat uphkang é nghut le gi, Garai Gasâng é noqkuq hpúng lé gi, hkâsu kut wó wú gon râ lúh?

⁶ Chángzo dut é a myáng shi é sù gi, hpúng-up wó kut râ a nghut, kut é nghut jáng, yhang gi, nghutbùn lò luí, jéyáng é hkyô lé nat Tsadán hui zô é su hui zo abe.

⁷ Hpúng-up rayuq gi, tûngbaù pé hí má ge é myìng wó é sù le dut râ lhê; haú jáng, yhang gi, taí hpoí pyâm é lé le a hui, nat Tsadán é tuihkyó má le a myí, dut râ nghut lhê.

⁸ Haú eq rajung za, hpungtê pé gi, hkungga gíng é bang, shô-kó a xân é bang, íhpê é jùn a dut é bang, a tengmán é amyat lé a ho é bang, nghut râ lhê.

⁹ Yhangmoq gi, lumjíng hkyô mâ é nik é mauhpo tengmán hkyô pé lé, sansêng é i-myit èq châng nyi ra râ nghut lhê.

¹⁰ Yhangmoq gi, chyam é lé hí huí wú kó sháng gaq, hau htâng, yhangmoq lé mara hún râ hkyô haí

a bò lo jáng, hpungtê mũ lé wùn kó sháng gaq.

¹¹ Haû eq rajung za, yhangmoq é yhumsîng myhî pé le, myit no nhang é dang a taí e za, dat sidiq é eq hkyô hkangmó má lumjîng luí, hkungga gîng é myiwe wuì, nghut ra râ dut lhê.

¹² Hpungtê rayuq gi, myiwe rayuq za wó é sù, yhangzô pé eq yhâng ikun lé rago za dat wùn waq é sù, dut ra râ nghut lhê.

¹³ Hpungtê mũ lé rago za wùn waq bê bang gi, yhumsîng é matú aróng lé le, Hkrisduq Yesuq lé yhangmoq lumjîng hkyô má, gyuq kyum é hkyô a bo é myit mó lé le, hkyak wó yu akô nghut ri.

¹⁴ Ngò gi, hkâ-myháng a myáng má náng chyáng lé jé râ matú, myit myoqbyu to kôhang, ahkyíng du myáng pyâm le,

¹⁵ Garai Gasâng é ikun hkaû má, byu pé hká dông nyì yap râ é hkyô lé, nàng sé sháng gaq nghû, pying kat é dang shi pé lé ká byì kat lhê; ikun haû gi, rû dui nyì é Garai Gasâng é noqkuq hpúng nghut luí, tengmán hkyo é hkungmó-zîng eq apûn awang nghut ri.

¹⁶ Tarâ hkungga hkyo é zaú tô é hkyô gi, ko dik é nghut é lé, ó yuq le wó he-ngik pyâm é a nghut;

haû gi, Yhang, byù gungsho má htoq shit mù, haû Woi-nyí mai Yhang lé saksé hkám byi luí, maumang lagyô pé gi, Yhang lé myàng bê nghut ri;

byuhú ahú hú má Yhâng é hkyô lé hko kyo mù, Yhang lé mingkan byu pé lumjîng luí, hpungwup shingkang eq Yhang lé mauhkûng shut shuî toq yû bê nghut ri.

4

Timohti Lé Mhoqshit É Hkyô

¹ Jihtùm buinyì pé má, byù ra-am gi, lumjǐng hkyô mai htak htoq ló luî, mhaú zô é woi-nyí pé htàng cháng kó râ eq nat gang mai lo é mhoqshit hkyô pé lé gyo byi kó râ nghut lhê ga, haú Woi-nyí gi, san za taí ri.

² Haú sù é mhoqshit hkyô pé gi, gegùn labyoq kut é byù-mhaú pê chyáng mai lo é nghut lhê; haú bâng é myit nhiklhum gi, nyhê nhe tô é shamtoq eq nyhê man tô é su dut byuq bê nghut ri.

³ Haú bang gi, hâng lhùm é hkyô lé hkùm tang é hkyô lé le, haú lumjǐng luî tengmán hkyô lé sê é bang mai jeju hkya-on mù hap yù ge é, Garai Gasang hpan to byí é zoshuq lé koi pyám nhang é le, kut akô nghut ri.

⁴ Garai Gasang hpan tô é lhunglháng gi, ge é chyat nghut ri; Garai Gasâng é mungdang eq kyûdûng é dang dông haú pé lé lhoq sân-yúng nyí é nghut é yanmai,

⁵ jeju hkya-on luî hap yu é nghut le gi, haí jung lé lháng he-ngik pyám râ hkyô a bò nghut ri.

⁶ Haú gumang wuì lé, nàng haú hkyô pé lhoq pun lhoq kyǐng é nghut le gi, nàng gi, haú nàng cháng bê ge é mhoqshit hkyô eq lumjǐng hkyô mâ é tengmán hkyô má, kô myhâng sù nàng nghut râ htoq agó, Hkrisduq Yesuq é ge é hpungmû wùn sù le dut râ nghut lhê.

⁷ Garai a bo é myit htoq mhô-myi dang eq hpô-myhí mâng pê é mhô-myi dangsôm lé koi pyám luî, tarâ hkunggâ é hkyô má yhumsing gùng lé lhoq kung yù aq.

⁸ Hkâsu mù gâ le, gungsho lé lhoq kûng é hkyô gi, akyû shau za htoq é nghut lhê; nghut kôhang, tarâ hkunggâ é hkyô kúm gi, jung hkangmó é matú akyû bo lhê nghut mù luî, shí ipyat má le, htang pyat má le, akyû bo nyi ri.

⁹ Haû gi, banshoq hap yù gíng é, lumjíng é mungdang nghut lhê.

¹⁰ Haû mù luî, xângzo byù banshoq bâng é hkyi yù Sû nghut é, je riyhang, lumjíng bâng é hkyi yù Sû nghut é, rû dui nyi é Garai Gasang má, nga-nhúng, myit myoqbyu to bê nghut é yanmai, nga-nhúng gi, gyai yhang shikut nyi lhê.

¹¹ Haú pé lé, hkunmó hkyó luî mhoqshit byî nyi aq.

¹² Náng é zorâm pyat lé, ó yuq èq le a wú tiq pyám sháng gaq, dang taí é má le, nyi yap é hkyô má le, chyitdap é hkyô má le, lumjíng hkyô má le, sansêng é hkyô má le, lumjíng bâng é matú alik kut shit nyi aq.

¹³ Náng chyáng ngò jé lé é buinyi jé shoq, nàng gi, Chyúmdang nghap kyô é má le, hko kyô é má le, mhoqshit é má le, ap nóng nyi aq.

¹⁴ Nàng gi, hpúng suwún wuî náng é ahtoq má loq ke byî é hkûn, myiqhtoi dang dông nang lé Garai Gasang byi to bê nghut é, woi-nyí hkyô eq sêng é chyunghuq lé, haí su a ngàm hkâkut pyám.

¹⁵ Haú hkyô pé lé, myit zìng zuq luî zui saí nyi aq; nàng kô myhang lo é hkyô lé, yuq hkangmó byu-myàng kó sháng gaq, náng gûng banshoq haú pé má ap nóng nyi aq.

¹⁶ Náng é asak duì hkyô má le, nàng mhoqshit é hkyô má le, rago sidiq nyi aq. Haú pé má ru gíng nyi aq, hkâsu mù gâ le, nàng haû su kut é nghut

jáng, náng é asak lé le, náng chyáng mai gyô yu é bang lé le, nàng wó hkyi yù râ nghut lhê.

5

Suwún Wuì, Chuimó Pé, Jùn Pé Eq Séng Luí Hpaqchyî Byî É Hkyô

¹ Asak ko sù lé dang htân a tân e za, yhumsing é îwa lé su, yhang lé lhoq pun lhoq kying aq. Zorâm wuì lé gi, gumang wuì lé su,

² asak kô é myiwe wuì lé gi, înu pé lé su zùm yap luí, zomyi wuì lé gi, nhammó wuì lé su sansêng é i-myt banshoq èq zùm yap nyi aq.

³ Gè gè yhang garúm râ dut é chuimó myhî pé lé, hkunggâ nyi keq.

⁴ Nghut kôlhang, chuimó myhí rayuq yuq gi, zoshâng nghut nghut, gashu nghut nghut, wó é nghut jáng, haú bang gi, yhumsing é ikun lé wú gon luí, înu îwa eq îchyí îwhoî pé lé jeju taú é dông, yhangmoq é lumjínng hkyô lé, zui saî é má lhoq mhán nhâng râ lé hí mhoq yû ra râ nghut lhê; hkâsu mù gâ le, haú gi, Garai Gasang ô nau é hkyô nghut ri.

⁵ Haú lùm râ ó yuq le a wó mù, gè gè yhang râ tô é chuimó myhí gi, Garai Gasâng chyáng myit myoqbyu nyi luí, nyí, myín xoq xoq kyûdung mù, Garai Gasang garúm râ hkyô lé dúng nyi ri.

⁶ Nghut kôlhang, ngón hkyô za cháng luí asak dui é chuimó myhí gi, asak dui nyi kôlhang, shí gù nghut bê nghut ri.

⁷ Yhangmoq lé, ó yuq èq le mara a hûn kó sháng gaq, haú hkyô pé lé le mhoqshit byî nyi aq.

⁸ Rayuq yuq, yhâng é buinùm ji-myi wuì lé a baú é htoq agó, je luí yhumsing é ikun byù lé a baú é nghut le gi, haù lumjínng hkyô lé he-ngik pyám bê nghut luí, a lumjínng su htoq má je ashop é sù dut bê nghut ri.

⁹ Hkyuq xê zàn byíng bê é chuimó myhí za a nghut jáng, chuimó jihpán má wó kat râ a nghut; hau htoq agó, yhang gi, yuqgè rayuq za wó wú é sù;

¹⁰ zoshâng wuì lé hku baú é sù, bíng lé rago dat hkulum é sù, sân-yúng bê bang é hkyí lé chí byí é sù, wuîhke huí tô é bang lé garúm luí, ge é muzó junghkang jungmó má yhumsing gùng yhang ap nóng nyi ri ga, yhang kut é ge é muzó má myìng hú é sù le, nghut râ lhê.

¹¹ Asak tiq é chuimó myhí pé lé, jihpán haú má hkâkat. Hkâsu mù gâ le, gungsho ô nau é hkyo èq Hkrisduq chyáng yhangmoq ap nóng tô é hkyô lé ung pyâm é hkùn, yhangmoq gi, myi ló naù kó râ nghut lhê.

¹² Haù mù, yhangmoq gi, sânng-hi lé yhangmoq tô tô é danggidiq lé lhoq hpyoq pyám kô é yanmai, tarâ darâ é hui zo kó râ nghut lhê.

¹³ Hau htoq agó, yhangmoq gi, rayhùm htâng rayhùm châng wang wún kômù, lagôn mán byuq kó râ nghut lhê. Lagôn é bang za dut kó râ a nghut, lumù gansang é bang eq yhangmoq taí a ge é pé lé taí kômù, yhumsîng eq a sêng é mù má châng wang nyo wún é bang le, dut kó râ nghut lhê.

¹⁴ Haù mù luí, gyè pé mai lumù gansâng dang a wó taí pyám kó sháng gaq, asak tiq é chuimó myhí pé gi, myi ló mù, zoshâng hkù luí, yhangmoq é ikun

lé gôn lajang râ matú, ngò, yhangmoq lé hpaqchyí byí kat lhê.

¹⁵ Hkâsu mù gâ le, ra-am gi, lhing taû ló kôluí, Tsadán é htâng châng nyì lugù nghut bekô nghut ri.

¹⁶ Lumjín é myiwe rayuq yuq gi, yhâng é ikun má chuimó myhí wó é nghut le, haú yuq é matú noqkuq hpúng lé wòlai a hun e za, yhang mai garúm yû ra râ nghut lhê; haú hkûn sheq, noqkuq hpúng gi, gè gè yhang râ tô é chuimó myhí pé lé wó garúm râ nghut lhê.

¹⁷ Haû noqkuq hpúng lé rago za shuí û é hpúng suwún wuî gi, akyû í tú hkam yù gíng lhê; haû mungdang hko é hkyô eq mhoqshit é hkyô má shikut é suwún wuî gi, je riyhang hkam yù gíng lhê.

¹⁸ Hkâsu mù gâ le, "Guq nâng nyì é no lé, nhuttsung hkâ-tsûng to byi." ✧ ga le, "Mû zui sù gi, yhâng é zuihpau wó yû gíng lhê." ✧ ga le, Chyúmdang má taí tô ri.

¹⁹ Hpúng suwún rayuq lé mara hun é hkyô lé, í yuq sum yuq mai saksé hkâm e za a nghut le gi, hkâlhom yù.

²⁰ Nghut kôlhang, lhoq pun lhoq kyîng é hkyô lé góbang wó yû kó sháng gaq, mara kut shut é bang lé, shiwa byu pê hí má tân mhoqshit aq.

²¹ Pying kat é dang shi pé lé, gamhkuí myit a bo e za châng nyì râ eq, myoqdong hkyîn luí haí le a kut râ matú, Garai Gasang eq Hkrisduq Yesuq é hí má le, hkyîn yù huí é maumang lagyô pê é hí má le, ngò, nang lé pying kat lhê.

22 Ó yuq é ahtoq má le loq ke* byi râ lé hkâhân; góbâng é mara hkaû má le hkâbo lòm. Yhumsîng yhang yhumsîng sân-yúng shoq kut nyî aq.

23 Náng é wamdau ra luî, anum num no lò lò dut é yanmai, nàng gi, wuì za shuq é hkyô lé nô pyám luî, tsibiyiq wing le ratsuí tsuí shuq byi aq.

24 Byù ra-âm é mara pé gi, de de dut é nghut mù luî, tarâ jéyáng é jang má hí ló jé ri; ra-âm é mara kúm gi, hau é htâng má châng byông htoq lo ri.

25 Haû eq rajung za, ge é muzó pé gi, de de nghut nyî luî, haû su de de a nghut é pé lé le, wó zaú to râ a nghut.

6

1 Jùn dut é wòlai hkaû má nyi é lhunglhang bang gi, yhangmoq é yhumsîng wuì lé gyai yhang hkungga gíng lhê nghû, myit yù râ dut lhê; haú hkûn sheq, Garai Gasâng é myìng eq nga-nhûng é mhoqshit hkyô gi, lumù gansang é a hui râ nghut lhê.

2 Lumjîng é yhumsîng wuì é jùn gi, gumang wuì nghut é yanmai, yhangmoq lé a wú myuq é za, yhangmoq dojaú luî akyû myang hkâm zô é bang gi, lumjîng bang eq chyitdap gíng é bang nghut é yanmai, yhangmoq lé je ge é dông dojaú râ lhê. Shí hkyô pé lé, nàng gi, yhangmoq lé mhoq byî nyi é eq lhoq pun lhoq kying byî nyi aq.

Ngùn Lé Chyitdap É Hkyô

3 Rayuq yuq gi, shut é lumjîng hkyô lé mhoqshit luî, nga-nhûng é Yhumsîng Yesuq Hkrisduq é

* 5:22 Haú hkun lhê bang gi, hpúng suwún kut râ matú hkyin to bê bang lé, loq ke kyûdung byî é nghut lhê.

tengmán mhoqshit hkyô eq tarâ hkunggâ é mhoqshit hkyô lé a myit huî é nghut jáng,

⁴ haú yuq gi, nghutbûn é sù eq haî lé le a sê gyô é sù nghut ri. Yhang gi, htuq htîng lhûm é hkyô pé lé ô nau é, a ge é myit bò luî, dang eq séng mù mabyoq lhoq htoq ri; haû mai, manon é hkyô, byoq lhum byoq cheq é hkyô, lumù gansang é hkyô, agè ashop é dông myit ngam pyâm é hkyô eq,

⁵ haû tengmán hkyô lé lhoq hpyuq pyâm mù, tarâ hkungga hkyô gi, ngùn zè wó hkyô za nghut ri ga myit yu é, i-myit lhoq htên pyâm bé bâng é gyoro má, byìn a huî é hkyô pé lé, lhoq htoq kat ri.

⁶ Nghut kôlhang, tarâ hkunggâ hkyô má nhik dik é hkyô bo é nghut le gi, amyat mó nghut nyi ri.

⁷ Hkâsu mù gâ le, nga-nhúng gi, mingkan htoq má haî jung le a yu wang lé, haû mai le haî wó yu htoq ló râ a nghut.

⁸ Haû mù luî, nga-nhúng gi, wutbu wutmè eq zoshuq wó é nghut jáng, hau èq nhik dik nyi sháng.

⁹ Wó naû sùt nau é byu pé gi, gunglaú hkyô eq tuihkyó má le, haû byoq yeq hkyô eq htên byoq hkyô má, byu pé lé myup shî nhang é, ngha é hkyô myo myo eq myit nò nhâng nau é hkyô má le, byit gyó wâng kó râ nghut lhê.

¹⁰ Hkâsu mù gâ le, ngùn lé chyitdap é hkyô gi, agè ashop hkyô ajung jûng é apûn awang nghut nyi ri. Byù ra-am gi, ngùn lé ô naû luî, haû lumjîng hkyô mai sô nghoq ló mù, yhumsing gùng lé yhumsîng, haû yón kuq hkyo èq htaû rot pyâm bekô nghut ri.

Timohti Lé Pying Kat É Dang

¹¹ Nghut kôlhang, Garai Gasâng é byù nàng gi, haú pé banshoq lé koi pyâm luî, dingmán hkyô,

tarâ hkungga hkyô, lumjîng hkyô, chyitdap hkyô, hkam jan hkyô eq nú-nhâm é hkyô pé lé châng hkat nyî aq.

¹² Lumjîng hkyô eq sêng é ge é majan le zân nyî aq. Hap yù lumjîng bê ga, saksé myo myô pê é hí má, ge é dông nàng yín yu é hkûn, wut yu é hui luî wó é ahtum abyuq é asak lé, zuî zing nyî aq.

¹³ Haû lhungháng lé asak byî é Garai Gasâng é hí má le, Pontu Pilat chyáng saksé hkâm nyi é hkûn, ge é dông yín yu é Hkrisduq Yesuq é hí má le, ngò, nang lé pyîng kat lhê:

¹⁴ Yhâng é ahkyîng yam-yoq jé jáng, Garai Gasang htoq shit nhâng râ nghut é sù, nga-nhûng é Yhumsîng Yesuq Hkrisduq htoq shit é buinyî jé shoq,

¹⁵ nàng gi, agot a-u é hkyô eq mara hûn râ hkyô a bo e za, hkunmó shî lé châng nyî aq. Garai Gasang gi, hkungsô wó sù, Yhang za up sù, hkohkam pê é Hkohkâm, yhumsing pê é Yhumsîng,

¹⁶ Yhang za ahtum abyuq dui nyî sù, a ge chyâng htep e é maubó má dui nyî sù, ó yuq èq le a myang wú é, a wó myang é sù nghut nyî ri. Aróng eq hpungwup a-tsam gi, Yhâng chyáng ahtum abyuq ru joq nyî sháng gaq ô! Amen.

¹⁷ Shí ipyat má wó sùt é bang gi, a gumrông râ eq a gîng é sutzè má yhangmoq é myit myoqbyù hkyô a tô e za, nga-nhûng nguîngón yuqyo nyî râ matú junghkang jungmó lé agùn agó byî é sù, Garai Gasâng chyáng za, yhangmoq myit myoqbyu nyî râ matú, hkunmó hkyó aq.

¹⁸ Ge é hkyô kut luî, ge é muzó má wó sùt nyî mù, a chum e za, gam chûng nau é myit bò râ matú,

yhangmoq lé hkunmó hkyó aq.

¹⁹ Haú dông mai, yhangmoq gi, jé lô râ ipyat é matú gîng é apûn awang dông, yhangmoq é matú sutzè wó tsîng to kó râ nghut lhê; haú hkûn sheq, yhangmoq gi, asak kyîng nghut é asak haû le wó zuî zîng to kó râ nghut lhê.

²⁰ Timohti ê, nang lé ap to bê hkyô lé, zúng nyî aq. Tarâ a hkunggâ é po-mîng ming bâng èq hpaqchyî nghut lhê ga myhîng shut é htuq htîng lhum lhum kut é hkyô lé, koi pyám aq.

²¹ Byù ra-am gi, haû lé hpaqchyî nghut lhê ga yín yû kôluî, haû lumjîng hkyô mai so nghoq htoq lô byuq bekô nghut ri.

Jeju gi, nungmoq chyáng ru joq nyî sháng gaq ô.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

23f9fc55-a8a4-59ef-9513-707ec336b0ee